

SCRIPT OF MORNING GOJRI NEWS BULLETIN 8MAY 2025 1015HRS

مارننگ گو جری نیوز بلیٹن مورخہ 8 مئی 2025

یوہ آکا شوانی جموں ہے باغ علی طاہر تیں خبر سُنو۔

LG HM MEETING

لیفٹیننٹ گورنر منوج سنہا نے کل مرکزی وزیر داخلہ امت شاہ نال ہوا کی اک اعلیٰ سطحی میٹنگ مانہ ویڈیو کانفرنسنگ غے زریعے شرکت کی ایل جی موصوف غے ہمراہ اس میٹنگ مانہ یو ٹی غا چید سیکرٹری ڈاکٹر ریکٹر جنرل پولیس تے دوجا اعلیٰ عہدیداران نے وی شرکت کی میٹنگ غے بعد لیفٹیننٹ گورنر نے عہدیداران نانہ ہدایت کی ہے جے وے وزیر داخلہ غی طرفوں جاری کی گئی رہنما سطور بنیاد ور کسے وی للکار غی صورتحال مانہ پیش آن آلی ہنگامی صورتحال سنگ نمڑن غی خاطر ضروری اقدام کریں انہاں نے دہشت گردی غے خلاف صفر برداشت غا عظم تے اُن غی مضبوط قیادت ور وزیر اعظم نریندر مودی غی تعریف وی کی۔ لیفٹیننٹ گورنر نے پاکستان تے پاکستانی مقبوضہ کشمیر مانہ ۹ دہشت گرد ٹھکاناں ور ۴۲ درست میزائل نشانان لان ور فوج غی تریاں شاخاں غی وی تعریف کی۔ اُن گو کہنو تھو جے اپریشن سندھور سنگ مہاری بہادر فوج نے پہلگام دہشت گردانہ حملہ گو بدلوا لے لیا ہے۔

DM BRO PROJECTS

وزیر دفاع راج ناتھ سنگھ نے کل سرحدی سڑک تنظیم بی آر او غا 50 اہم دفاعی اہمیت غا پروجیکٹ قوم نانہ وقف کیا ہیں جن مانہ جموں کشمیر مانہ بنایا گیا اک سڑک تے 5 پلاں گا پروجیکٹ شامل ہیں ان پروجیکٹاں غی تکمیل ور لیفٹیننٹ گورنر منوج سنہا نے وزیر اعظم نریندر مودی تے وزیر دفاع گو شکریو ادا کیو ہے انہاں نے اُمید ظاہر کی ہے جے دفاعی اہمیت غا ان 6 پروجیکٹاں غی تکمیل سنگ جموں کشمیر غی سماجی تے اقتصادی صورتحال ور خاصو مثبت اثر پے گو۔ لیفٹیننٹ گورنر نے کہیو جے بی آر او غا ان پروجیکٹاں غا مکمل ہون سنگ متعلقہ ضلعان غا لوکاں نانہ فائدو پُجن غے نال نال مسلح افواج نانہ اپنی پیشہ وارانہ سرگرمیاں غی انجام دیہی مانہ وی بہتر رابطو مہیا ہوسکے غو۔

ALL PARTY MEET

سرکار نے اج نویں دلی مانہ اوپریشن سندھور غا پس منظر مانہ اک کل جماعتی میٹنگ بلائی ہے میٹنگ غے دوران بکھ بکھ سیاسی جماعتان نانہ اس کاروائی بارے جانکاری دتی جائیگی۔ واضع رہ جے سیاسی جماعتان غی وبستگیاں تیں اُپر اُٹھ غے تمام لیڈراں نے اوپریشن سندھور غی تعریف کرتا وائ دہشت گردان غے خلاف کیجان آلی اس کاروائی ور اپنی فوج غی کارکردگی ور فخر غو اظہار کیو ہے واضع رہ جے اس توں پہلاں پہلگام دہشت گرد حملہ غا

پس منظر مانہ کی جان آلی دہشت گرداں غے خلاف کاروائی ور حزب اختلاف غی تمام سیاسی جماعتاں نے حکومت غی حمایت غو اعلان کیو تھو۔

LOC FIRING

فوج نے گزشتہ رات پاکستان غی طرفوں کنٹرول لائن ور کیجان آلی فائرنگ غو موثر جواب دتو ہے دفاعی زریعاں نے دسیو ہے جے پاکستانی دستاں نے کپواڑہ بارہمولہ اوڑی تے اکھنور مانہ کنٹرول لائن ور لوہکا ہتھیاراں سنگ بلا اشتعال فائرنگ کی ہے جس غو بھارتی فوج نے وی منہ توڑ جواب دتو ہے۔

DIV COM SCHOOLS CLOSED

جموں غا ڈویژنل کمشنر غی طرفوں جاری کیا گیا اک حکم نامہ غے مطابق اج جموں ڈویژن غا ۵ ضلعان مانہ تعلیمی ادارا بند ریں گا حکم نامہ غے مطابق موجودہ صورتحال غے پیش نظر جموں سانہ کٹھوعہ راجوری تے پونچھ ضلعان مانہ تما تعلیمی ادارا بند رکھن غی ہدایت کی گئی ہے یوہ فیصلو سرحد ور موجودہ کشیدگی صورتحال تے جاری حفاظتی کاروائیاں غے پیش نظر کیو گیو۔

POONCH SHELTER CAMPS

موجودہ کشیدہ صورتحال غے پیش نظر لوکاں نانہ محفوظ جگہاں ور منتقل کیا جان موجود انتظامات غے بشکار ضلع انتظامیہ پونچھ غی طرفوں تیار کیا گیا بکھ بکھ ایسا محفوظ مقامات گو تفصیلی جائیزو لیو گیو ایڈیشنل ڈپٹی کمشنر اسٹینٹ کمشنر رونیو سی پے او تے تحسین دار حویلی ور مشتمل سنئیر افسراں غی اک ٹیم نے ان مجوزہ کیمپاں غو درو لاغے ات موجود تمام ضروری سہولتاں غو جائیزو لیو انتظامیہ غی طرفوں لوکاں نانہ یقین دوايو گیو ہے جے ان پناہ کیمپاں مانہ تمام ضروری سہولت دستیاب کرلی جیں گی۔ جن مانہ رہن غی جگہ خوارک تے طبی سہولت شامل ہیں۔

PEOPLE SAFER PLACES

اکھنور سرحد غے نیڑے رہن آلا بسنیک پاکستان غی طرفوں فائر بندی غی خلاف ورزی کرتا واں کیجان آلی پہلی فائرنگ تے گولہ باری غے بعد محفوظ جگہاں ور منتقل ہو رہیا ہیں پہلگام دہشت گردانہ حملہ غے بعد لوکاں مانہ خوف و ہراس غی صورتحال موجود ہے تے کئی لوکاں نانہ حالات مزید کشیدہ ہو جان غو اندیشو ہے سرکار غی طرفوں ان لوکاں نانہ محفوظ مقامات ور پُجان غی خاطر بس خدمات مہیا کرلی گئی این اس موقع ور بولتا واں لوکاں غو کہنو تھو جے وے اپنی رہائش گاہاں ور محفوظ نہیں این تے وے خوف غا ماحول مانہ جی رہیا ہیں۔ اواں سلامتی دستاں تے فوج نانہ زیادہ توں زیادہ چوکسی ور رکھيو گیو ہے تے سرحدی علاقان ور نزدیک تیں نظر رکھی جارہی ہے اجیں توڑی کسی غا زخمی ہون غی کوئے اطلاع نہیں ہے تے صورتحال ور نزدیک تیں نظر رکھی جارہی ہے۔

BIRHON BRIDGE

سال جولائی ۲ ہزار ۱۲ مانہ ادمپور غا بر ہان پُل نانہہ پُجیا نقصان غے بعد نواں پُل غی تعمیر مکمل کر لی گئی ہے جس غو باقاعدہ افتتاح کردتو گیو ہے یوہ پُل ۱ سو ۰۳ میٹر لمو ہے تے اس نانہہ ولے سرے مکمل کر لیو گیو ہے اس پُل غو افتتاح ادمپور مغربی اسمبلی حلقہ تیں اہم ایل اے پون کمار گپتا غے ہمراہ بی آر او غا افسراں غی طرفوں کیو گیو ہے اس موقع ور کئی مقامی افراد وی موجود تھا۔

WEATHER

اج سویرے تیں جاری شدید بارش نے جموں شہر اور اس غا کول قال غا علاقوں نانہہ متاثر کیو، جس غی وجہ تیں نشیبی علاقوں میں پانی جمع ہو گیو تے معمولاتِ زندگی میں خلل پیو صبح غے وقت سفر کرن آلا افراد نانہہ شدید بارش تے پانی تیں بھری سڑکوں غے باعث اپنی منزل تک پُجن مانہہ دشواری غو سامنو کرنو پیو۔ اس موسلا دھار بارش نے جموں شہر اور قریبی علاقوں میں درجہ حرارت میں نمایاں کمی کر دتی ہے۔
